



19. november 2024

UKA2024/50

Nunatsinni nerisarineqartut pisiniarfinni akiinut suut tunngaviusarnerat pillugu Naalakkersuisut nassuiaasiornissamik peqquneqarnissaannik Inatsisartut aalajangiiffigisassaattut siunnersuut. Nioqqutissat akitigut pisisartunut pilerinarnerulersinniarlugit qanoq iliortoqarsinnaanera nassuiaammi ilanngullugutikkuarneqassaaq. Nassuiaat kingusinnerpaamik UKA2025-mi saqqummiunneqarsimassaaq.

(Inatsisartunut ilaasortaq Mariane Paviassen Jensen, Inuit Ataqtigiit)

Siumut sinnerlugu siunnersuuteqartoq Mariane Paviassen Jensen qutsavigaarput.

Soqutiginarluinnartumik qaqitaqarputit ajoraluatumilli piffissaq eqqarsaatigalugu uggonaraluartumik kingusippallaanera peqqutigalugu siunnersuutip qinersinissamut qanippallaarsinnaanera peqqutigalugu kiviinnaratarsinnaanera ernummatigaarput, naak nassuiaasiortoqarnissaanut soqutiginarluinnartumik suliassaq isiginiagassaagaluartoq...

Siumup tunngaviusumik siunertaata ilaani allassimasoqarpoq, "Pilersikkumallugit inuiaqatigiit nunamik tunniussinnaasai akisussaassuseqartumik atorluarlugit avataaniillu pisariaqartitatik iluaqutigalugit imminut napatittut". Inuiaqatigiit ataqtigiissut, ilatsiinnartuunngitsut, eqeersimaartut napassinnaalluurtullu inuiaqatigiittut akisussaaqataanertik qamuuna misigisimalluarlugu ilumoorfigalugulu innuttaaqataasut.

Nunarsuatsinni pisut najummatsisimanartumik inissisimaneranni avataaniillu isumalluuteqarnerujussuaq illua tungilerniarlugu, nunatta pisuussutaanik atuinerulernissamik eqqarsarneq timitalersorlugu aallartikkasuartaqartoq siumumiit isumaqarpugut. Immami uumasut, nunamilu uumasut naassaanngitsumik pisuussuteqarnerput qularnaatsuvoq, atorlualertariaqarpagut peqqinnarneruppummi. Ajoraluurtumilli akitigut imminut inorseqqavugut.

Siunnersuuteqartup tunngavigisaa Siumumiit paasisinnaalluarparput, sulimi nunatsinni pisuussutitsinnik tamakkiisumik atuilersimanngilagut, minnerunngitsumik nammineq pilersornitta tamakkiisumik atuutsinneqannginnera tamatta ilisimaaraarput, tamanna kipiluttunarujussuaqaaq. Nunatut pisuussutigut atorluartariaqarpagut pingaartumik inuussutissat neqit aalisakkat naatitallu, nunarpummi avannaarsuaniit nunatta kujaterpiaanut nunattalu kangianut taamannak inuussutissaq taamannak vitaminit taamannak piniagassat tamaasa atorlualertariaqarpagut. Puulukimineq nersorsuaminerlu kisiisa isumalluutigiunnaartariaqarpagut.

Aaqqissuussaanerput equngasumik ingerlasoq tigussaasumillu politikikkullu sinaakkusiiniarnata eqqartorluarlutigulu ajornartorsiutaanerarlugu, oqarusuppugulli qangarsuarliliuna nunami maani pisuussutitsinnik atuillutalu nammineq pilersulersimasariaqaraluartugut. Uumasooq sunaagaluartorluunniit killilersorniangaaratsigu suna tamarmik nalitunerpaanngorlugu immitsinnut inorsilluta ingerlatsiniarsarluta.



Assersuutigilara “qaleralimmik qullukkiaq” kg-mut 1100 kr niuertarfinni pisiarisarparput, aamma qilalukkap mattaa kg-mut 500 kr-lerlugu pisiarisarparput, sooruna? Sooruna taava piniartup neqaarniarnermini ilaatigut pingajorarterutaannaanik akilerlugu tunisaraa? Sunaana akunnerani akitsorsaarujussuarluni inissittartoq? Siumumiillu apeqquuserluartagarput ilumut iluanaaruteqartarnermut inatsit pisariaqannginnerpa inuussutissat tungaatigut atuutsitsissalluta? Aamma nunami maani inuussutissalerinermut oqartussaaffik peqquutiinnarlugu imminut pilersorsinnaanerput killilersorujussuarparput, piffissanngunngila piaartumik aaqqiivigissallugit. Aap nassuiaatissartaqarput, taamaattorli QAQUGU aaqqiissagatta, suliaasanut imaattunut piumassuseq annertunerusariaqartoq isumaqarpugut.

Taamaattumik siunnersuuteqartoq tapersingaarlugu Siumumiit siunnersuut ilalerluinnaratsigu oqarusuppunga. Naak ingerlaqqikkaluarluni kiviinnarsinnaanera aarlerinaraluarluni, ataatsimiititaliami eqqartorluarneqarnissaa kissaatigaarput.

Ilanngullugu apeqquutigineqarsinnaavoq qulaajarlugulu inuussutissalerinermut oqartussaaviup sumut killinneranik paasiniaanissaq. Aamma nammineq pilersornissamut periusissiap nangittumik suliarineqarnera kalaaliminernik tunngatillugu ilanngullugu qulaajaavigineqassasoq.

Siumumiit siunnersuuteqartoq qutsavigaarput, ataatsimiititaliamullu susassaqtumut ingerlateqqillutigu.

Lars Poulsen, Siumut